



Arkivnr: 2017/4053-1
Saksbehandlar: Jostein Farestveit

Saksframlegg

Saksgang

Utval	Saknr.	Møtedato
Fylkesutvalet		23.05.2017

Oppretting av søknadsbasert ordning for næringsretta partnerskapsmidlar

Samandrag

Hordaland fylkeskommune har i ei rekke år støtta organisasjonar og tiltak som har vorte vurdert som strategisk viktige for å gjennomføre næringsutviklingsarbeidet i Hordaland.

Fylkeskommunen løyver årleg partnerskapsmidlar til næringsretta utviklingsaktørar etter vedtak i Fylkesutvalet.

Gjeldande forvaltingspraksis for midlane vart vedteke i 2013 og har trong for revisjon. Reduksjon i fylkeskommunen sine eigne budsjett til regional utvikling, og nedtrekk og endringar i målstrukturen for statlege Regionale utviklingsmidlar dei siste åra, gjer at midlane er lite føreseielege for aktørane som vert løyvd slik støtte.

Forvaltingsrevisjonen som vart gjennomført for Regionale utviklingsmidlar i 2016 peika òg på uklare retningslinjer for tildeling av partnerskapsmidlar, særleg med omsyn til utlysing av midlane.

Denne saka fremjar forslag til korleis midlar til næringsretta partnerskap skal forvaltast for 2018 og framover.

Forslag til vedtak

1. Fylkesutvalet vedtar med utgangspunkt i Regional planstrategi 2016-2020 og Regional næringsplan 2013-2017 reviderte retningslinjer for Næringsretta partnerskapsmidlar med verknad frå 2018.
2. Fylkesutvalet vedtar følgjande framdrift for tildeling av midlar:
 - Juni 2017: Fylkeskommunen lyser ut partnerskapsmidlar til næringsretta utviklingsaktørar
 - August/september: søknadsfrist
 - Oktober 2017: Innstilling om tildeling vert fremja i fylkesrådmannen sitt framlegg til budsjett 2018
 - Desember 2017: Fylkestinget vedtar kva aktørar som skal løyvast næringsretta partnerskapsmidlar for 2018, med intensjon om støtte for tre år.
3. Fylkesutvalet vedtar at vurdering av partnerskapsmidlar skal gjerast opp mot følgjande kriterier knytt til prioriterte aktørar:
 - a) Aktøren arbeider med å fremje entreprenørskap og innovasjon, knytt til nye bedriftsetableringar og/eller vekst i eksisterande bedrifter.
 - b) Aktøren samlar og styrkar innovasjons- og/eller entreprenørskapsarbeidet i ein større del av fylket/region. Aktøren famnar over minst to kommunar.
 - c) Aktøren har innsatsen retta mot område/regionar med høg eller vekst i arbeidsløysa.

4. I tillegg kan følgende punkt vere relevant å drøfte i særskilte tilfelle:

Aktører med lite anna offentleg støtte kan verte støtta i særskilte tilfelle, uavhengig av arbeidet med entreprenørskap og innovasjon

Aktører som vert finansiert saman med andre fylkeskommunar, må også vurderast opp mot dei andre fylkeskommunane sine prioriteringar.

Rune Haugsdal
fylkesrådmann

Bård Sandal
fylkesdirektør regional utvikling

Saksframlegget er godkjent elektronisk og har derfor inga underskrift.

Fylkesrådmannen, 05.05.2017

1. Bakgrunn

Fylkesutvalet vedtok i august 2013 gjeldande retningslinjer og forvaltningspraksis for næringsretta utviklingsaktørar (PS 199/2013). Med dette som bakgrunn fremjar fylkesrådmannen ei årleg sak til Fylkesutvalet med vurdering av aktørar som skal løyvast slik støtte.

Fylkeskommunen har i ei rekke år støtta organisasjonar og tiltak som har vorte vurdert som strategisk viktige for å gjennomføre næringsutviklingsarbeidet i Hordaland.

Fylkesrådmannen ser no trong for ein revisjon av denne forvaltningspraksisen, mellom anna med bakgrunn i forvaltningsrevisjonen for Regionale utviklingsmidlar som vart gjennomført i 2016, og utfordringa med endra målstruktur for dei statlege Regionale utviklingsmidlane.

Saka er ei oppfølging av vedtak 3 som Fylkesutvalet fatta i PS 45/2017, gjeldande tildeling av partnerskapsmidlar til næringsretta utviklingsaktørar:

3. Ordninga med næringsretta partnerskapsmidlar vert gjennomgått av fylkesrådmann og eit framlegg til ei søknadsbasert ordning vert fremja til politisk handsaming våren 2017.

1.1 Forvaltningspraksis frå 2013

PS 199/2013 vart utarbeidd på bakgrunn av at det var ulik forvaltningspraksis mellom næringsretta aktørar som vart løyvt mellombelse driftstilskott frå fylkeskommunen.

Medan aktørar som vart løyvd driftstilskott over fylkeskommunen sitt budsjett fekk dette vedtatt i budsjetthandsaminga til fylkeskommunen, vart aktørar som fekk løyvd driftstilskott over Regionalt utviklingsprogram (no Handlingsprogram for næringsutvikling, HNH) handsama administrativt, etter at den årlege tildelinga til regional utvikling frå KRD var gjort.

Fylkesutvalet vedtok at all tildeling av driftstilskott skulle gjerast av fylkesutvalet. Budsjettposten «Mellombelse driftstilskott» vart gjeve nytt namn «Næringsretta partnerskapsmidlar» og alle aktørar som dei komande åra skulle verte løyvd partnerskapsmidlar skulle vurderast opp mot følgande kriterier:

- a) Aktørane skal gjennom definerte aktivitetar og tiltak medverke til å oppfylle mål og prioriterte innsatsområde i regional næringsplan, regionalt utviklingsprogram og eventuelle vedteknede næringsretta strategiar på det aktuelle feltet.
- b) Er fylkeskommunal støtte avgjerande for eksistensen for samarbeidsaktørane, eventuelt for dei aktivitetane fylkeskommunen ønskjer å styrke
- c) Vil fylkeskommunal støtte medverke til betre samarbeid og fagleg koordinering av innsatsen i høve til andre aktørar med same eller tilgrensande arbeidsfelt/fagområde
- d) Vil fylkeskommunal støtte medverke til betre ressursutnytting gjennom fysisk same lokalisering, felles kontor etc.
- e) For prosjekt og einingar under nasjonale næringsutviklingsprogram blir det i tillegg lagt inn som eit prioriteringskriterium om fylkeskommunale midlar vil ha ein utløysande effekt ved etablering eller medverke til monaleg høgare aktivitetsnivå. Dette skal også gjelde regionale tiltak og einingar med tilsvarende formål, men som ikkje er med i nasjonale program.

Vidare vart følgande forvaltningsregime vedtatt:

- a) Alle saker om fleirårige samarbeidsavtaler og støtte skal handsamast av fylkesutvalet
- b) Avtalane skal vere tidsavgrensa til ein periode på 3 år, men kan i tilfelle der det er særlege grunnar for det gjelde for inntil 5 år. I ei sak om vidareføring for ein ny periode skal samarbeidet vurderast i høve til inngått avtale og til punkta over.
- c) Moglegheita for finansiering av ein aktør over RUP budsjettet for ein periode på 3 til 5 år skal normalt nyttast før ein eventuelt fremmer forslag om overføring til budsjettposten Mellombelse driftstilskott. Aktørar som blir finansiert over Mellombelse driftstilskott skal normalt ikkje overførast til RUP budsjettet, sjølv om omfanget av samarbeidet blir justert/endra.

- d) Fylkeskommunal støtte til aktører under ordningar i regi av nasjonale virkemiddelaktørane skal skje frå RUP-budsjettet, også utover ein periode på 5 år, dersom ikkje særskilte forhold talar for noko anna. Der dette er mogleg, vil dette også gjelde andre regionale aktører med tilsvarande føremål og organisering, men som av ulike grunner ikkje er med i ei ordning under dei nasjonale virkemiddelaktørane.
- e) Saker om vidareføring a samarbeid må vere avgjort så tidleg på året at ei eventuell vidareføring av samarbeidet kan innarbeidast i budsjettet for året etter.

2. Gjeldande forvaltingspraksis - utfordringar

2.1 Endring i økonomiske rammer

Gjeldande forvaltingspraksis har fungert godt gjennom perioden. Fylkesutvalet har årleg vedteke kva aktører som skal tildelast støtte, på bakgrunn av gjevne aktivitetar knytt til Handlingsprogram for næringsutvikling i Hordaland. Aktørane har inngått partnerskapsavtalar med fylkeskommunen knytt til midlane, kor ein har konkretisert aktivitetar, tidslengd og støttebeløp.

Det har vore ei klar deling mellom dei to finansieringspostane

- Fylkeskommunen sin budsjettpost «Næringsretta partnerskapsmidlar»
- «HNN – statlege overføringer»

Dei siste åra har likevel mindre føreseielegheit, både for midlar løyvd over fylkesbudsjettet, og over Statsbudsjettet til regional utvikling, gjeve utfordringar med å oppretthalde dei vedtekte støttenivåa til dei ulike aktørane.

Fylkeskommunen sin budsjettpost «Næringsretta partnerskapsmidlar» har vorte gradvis redusert frå 2012 og fram til i dag, med 3 millionar kroner.

Budsjettpost «HNN-statlege overføringer» har sidan 2013 hatt følgjande utvikling:

Mill kr	2013	2014	2015	2016	2017
HNN- statlege overføringer	72,7	60,7	56,8	47,3	58,1

Frå og med 2017 har dei statlege overføringane også fått ei sterkare målstyring, som gjer mindre rom for å nytte midlar til næringsretta partnerskap i heile fylket.

I tildelingsbrevet til fylkeskommunen er det klare føringar for kva desse midlane skal nyttast til:

- Bedriftsretta låne- og tilskotsordningar i distrikta kr 23 560 000 (Vert årleg overført til Innovasjon Noreg som midlar direkte til bedrifter)
- Inkluderande og vekstkraftige lokalsamfunn i område med særskilte distriktsutfordringar kr 18 540 000 (Ref PS 86/2017)
- Velfungerande næringsmiljø og tilgang til relevant kompetanse kr 7 000 000
- Nye arbeidsplassar i område som er ramma av vesentleg reduksjon i sysselsetjinga kr 9 000 000

Fylkesutvalet vedtok i PS 86/2017, *Bruk av regionale utviklingsmidlar i kommunar med særskilte distriktsutfordringar*, at midlane knytt til inkluderande og vekstkraftige lokalsamfunn i område med særskilte distriktsutfordringar, kan nyttast i eit større geografisk område. Vedtaket gjev fylkeskommunen noko større handlingsrom, men aktørar i Bergen og omegnskommunane kan ikkje løyvaste midlar frå denne budsjettposten.

I praksis betyr dette at den største delen av eventuelle midlar til næringsretta partnerskap over budsjettpost «HNN-statlege overføringer» må takast av dei kr 7 mill, då desse kan nyttast i kommunar i heile fylket. Dette vil gje fylkeskommunen lite rom for å støtte næringsutviklingsprosjekt og tiltak i Bergensregionen, og å oppfylle dei måla Kommunal- og moderniseringsdepartementet har sett for midlane.

«HNH statlege overføringar» er regulert av «Forskrift for distrikts- og regionalpolitiske virkemidler» som seier at midlane i skal ha utløyssande effekt på prosjekt og tiltak, og ikkje nyttast til drift av organisasjonar, med nokre unntak.

«Unntak er tilskudd under programmer eller ordningar i regi av de nasjonale virkemiddelaktørene, Kommunal- og moderniseringsdepartementet, Ungt entreprenørskap og Merkur, der støtte kan gis i tråd med programmenes/tiltakens varighet»

Fylkeskommunen har difor rom for å støtte nokre av dei næringsretta partnarane lokalisert utanfor Bergensregionen over budsjettpost «HNH statlege overføringar», men i mindre grad enn tidlegare år.

Den nye målstrukturen medførte at framføre budsjetthandsaminga for 2017, fekk alle næringsretta aktørar som mottar partnarsskapsmidlar frå fylkeskommunen, brev om at støtta for 2017 kunne verte redusert eller terminert.

Det er òg utfordrande at i 2017 er det to aktørar som samla mottar halvparten av midlane over budsjettposten «Næringsretta partnarsskapsmidlar», Bergen Vitensenter AS og Fjord Norge AS.

Fylkeskommunen klarte gjennom bruk av unytta midlar frå tidlegare år, også i 2017 å tildele midlar til alle aktørane som Fylkesutvalet vedtok å støtte. Dette vil ikkje vere ei berekraftig forvaltning over fleire år, med eit stadig strammare budsjett.

Fylkesrådmannen vert difor i si innstilling om fordeling av næringsretta partnarsskapsmidlar for 2018 nøydd til å gjere vesentlege prioriteringar, om ikkje den fylkeskommunale budsjetttramma vert styrka.

2.2 Utfordringar med det noverande forvaltingsregimet.

Gjeldande forvaltingsregime legg opp til at næringsretta partnarsskapsaktørar i ein utviklingsfase skal finansierast over budsjettpost «HNH-statlege overføringar» for så etter 3-5 år å eventuelt overførast til fylkeskommunen sin budsjettpost «Næringsretta partnarsskapsmidlar». I perioden 2013-2017 har særskilt få aktørar vorte tatt ut av budsjettet, medan regimet legg opp til at stadig fleire aktørar skal inn på fylkeskommunen sitt budsjett.

Praksisen har medført at fleire av partnarane over tid har fått reduserte rammer, men få aktørar har vorte tatt ut av ordninga. Med føremål om å fremje sterke samarbeidspartnarar, er dette ei lite berekraftig løysing for dei komande tre åra.

2.3 Forvaltingsrevisjonen for regionale utviklingsmidlar

Forvaltingsrevisjonen som vart gjennomført for Regionale utviklingsmidlar i 2016 peika òg på nokre svakheit ved ordninga med partnarsskapsmidlar som fylkesrådmann no legg opp til å forbetre. Det er særskilt tre punkt fylkesrådmannen har merka seg:

- Det er ikkje klare nok rutinar for korleis nye aktørar søker om å få tildelt partnarsskapsmidlar
- Det er uklarheit rundt dei ulike støttenivåa til aktørane.
- Revisjonen stilte òg spørsmålsteikn ved om dei Regionale utviklingsmidlane kan nyttast til partnarsskapsmidlar i så stor grad som har vore tilfellet tidlegare.

2.4 Føreseielege tildelingar for aktørane

Fylkesrådmannen ser òg utfordringar med at den politiske saka om tildeling av næringsretta partnarsskapsmidlar vert handsama av Fylkesutvalet etter at fylkeskommunen sitt budsjett er vedteke. Dette er vorte gjort då tildelingsbrevet frå Kommunal- og moderniseringsdepartementet gjeldande Regionale utviklingsmidlar ikkje brukar å vere klart før januar inneverande år.

Aktørar som mottar partnarsskapsmidlar frå fylkeskommunen peikar på at ordninga treng å vere føreseieleg og at vedtak om støtte bør kome tildegare enn det som har vore praksis dei siste åra.

Fylkesrådmann vil med ei omlegging av støtteordninga, fremje si innstilling om næringsretta partnerskapsmidlar i samband med fylkesrådmannen si innstilling til budsjett 2018. Dette vil vere uavhengig av kva budsjettpost den eventuelle næringsretta partnaren vert løyvd midlar frå.

3. Forslag til ny ordning for næringsretta partnerskapsmidlar for 2018

Fylkesrådmann vil legge om ordninga frå og med 2018, slik at alle aktuelle aktørar no må søke om å verte tildelt partnerskapsmidlar samstundes, og på det same grunnlaget.

Dersom det ikkje er særskilte gode grunnar, ser fylkesrådmann for seg at aktørane kan søke om årleg støtte frå fylkeskommunen på inntil kr 1 mill.

Fylkesrådmann sitt forslag til handsaming av næringsretta partnerskapsmidlar vil sjå slik ut:

- Juni 2017: Fylkeskommunen lyser ut partnerskapsmidlar til næringsretta utviklingsaktørar basert på vedtak i denne saka.
- August/september: Søknadsfrist
- Oktober 2017: Innstilling om tildeling basert på tildelingskriteria i denne saka vert fremja i Fylkesrådmannen sitt framlegg til budsjett 2018
- Desember 2017: Fylkestinget vedtar kva aktørar som skal løyvast næringsretta partnerskapsmidlar for 2018, med intensjon om støtte for tre år.

- Dette inneber at alle aktørar som mottar næringsretta partnerskapsmidlar i 2017 vil måtte søkje om slik støtte frå 2018, og at eventuelle nye aktørar vil ha mogelegheit til å søkje. Fylkesrådmann understrekar at alle gjeldande partnerskapsavtalar går ut etter 2017, slik at ingen gjeldande avtalar treng terminerast grunna denne endringa.

- Fylkesrådmann rår til at det vert vedteke støtte for tre år, slik at dei aktuelle aktørane kan planlegge langsiktig. Tildelingane må ta høgde for budsjettendringar ved den årlege handsaminga av budsjett i Fylkestinget.

- Det vert i treårsperioden ikkje lagt opp til ei årleg utlysing.

- Nye aktørar som vert etablert i treårsperioden, som kan vere relevante for næringsretta partnerskapsmidlar, vert vurdert støtta over budsjettpost «HNN statlege overføringar» gjennom egne saker til Fylkesutvalet.

4. Aktørar som mottar støtte i 2017

I 2017 mottar totalt 30 aktørar næringsretta partnerskapsmidlar (Tildelinga til Regionråda er delt på fem regionråd), fordelt på to budsjettpostar.

Aktørane som mottar slik støtte skal gjennom konkrete partnerskapsavtalar oppfylle mål og prioriterte innsatsområde i Handlingsprogram for næringsutvikling i Hordaland.

Dei største løyvingane vert gjort over fylkeskommunen sin budsjettpost «Næringsretta partnerskapsmidlar, som i 2017 er på kr 12 298 000.

Oversikt over støtte frå budsjettposten "Næringsretta partnerskapsmidlar" (Tal i heile 1000 kr)

Organisasjon	Løyving
Fjord Norge	3 000
Reiseliv: Fellesoppgåver	1 010
Western Norway Film Commission	500
Regionråda i Hordaland	1 012
Mediefondet Zefyr AS	900
Maritimt forum Bergensregionen	450
Design Region Bergen	450
Nordiske mediedager	200
HOG Energi	750
Impact Hub Bergen	526
Connect Vest	500
Bergen Vitensenter AS	3 000
Samla løyving	12 298

Fylkesrådmann styrka i 2017 ramma med kr 200 000 med midlar frå budsjettpost «HNN-fylkesmidlar» for å sikre tildeling til dei aktørane Fylkesutvalet vedtok å støtte.

I tillegg fatta Fylkesutvalet i møte 30.03.2017, i PS 85/2017, følgjande vedtak:

Kr 500 000 vert løyvd Bergen Vitensenter AS øyremerkt til vidaregåande skular sin bruk av senteret. Midlane vert løyvd gjennom fylkesutvalet sin rådveldekonto.

Samla løyving til næringsretta partnarar over fylkeskommunen sitt budsjett i 2017 vart slik kr 12 798 000.

I tillegg har partnarar som er med i nasjonale næringsutviklingsprogram, og aktørar som er vurdert å vere i ein oppstartsfase fått støtte over budsjettpost «HNN- statlege overføringar».

For 2017 får følgjande aktørar midlar over budsjettpost «HNN statlege overføringar».

Aktørar med støtte over "HNN statlege overføringar" (Støtte i heile 1000 kr)

Organisasjon	Løyving
Atheno	683
Industriutvikling Vest	683
Nyskapingsparken Inkubator	683
Ungt Entreprenørskap	400
Mediaregion Bergen	350
Matarena AS	200
Næringshagen i Hardanger	100
Næringshagen i Gulen og Masfjorden	50
Næringshagen på Voss	100
Nordhordland næringshage	100
NCE Seafood Innovation Cluster	250
NCE Maritime Clean Tech	200
NCE Media	200
GCE Subsea	350
NCE Toursim	150
Samla løyving	4 499

5. Langsiktige mål for næringsutvikling i Hordaland

Med utgangspunkt i tildelte rammer har fylkesrådmann behov for spissare tildelingskriterier frå 2018, for å kunne prioritere aktuelle aktørar opp mot gjeldande mål for regional utvikling. Det er særskilt to vedtekne planar som er førande for arbeidet med næringsutvikling i Hordaland.

5.1 Regional Planstrategi 2016-2020

Regional Planstrategi 2016-2020 har følgjande hovudmål:

- Høg sysselsetjing
- Eit inkluderande samfunn
- Klima- og miljøvenleg utvikling
- Samarbeid i ein sterk Vestlandsregion

Det er særskilt målet om høg sysselsetting som er relevant for arbeidet med næringsutvikling i Hordaland. Hovudmålet har følgjande strategiar:

1. Auke nyetablering og framtidretta verdiskaping i næringslivet
2. Betre samhandling innan utdanningssektoren og regionalt arbeidsliv
3. Auke forskning som verktøy for marknadsretta innovasjonar i arbeids- og næringsliv

5.2 Regional næringsplan for Hordaland 2013-2017

Regional næringsplan har følgjande overordna mål:

- Fleire innovative verksemdar som betre nyttar moglegheiter i marknadane
- Større del av gründerar som etablerer berekraftige vekstverksemdar
- Fleire innovative næringsmiljø, der verksemdene samarbeider tettare seg imellom og med FoU-miljøa og deira internasjonale kontaktnett
- Verkemiddelaktørar som enno betre stør opp om berekraftige verksemdar og næringsmiljø
- Teke naudsynte politiske avgjersler om (nærings-) areal. Utbyggingsmønster og transport som gjev grunnlag for ein berekraftig og konkurransedyktig bergensregion
- Fleire døme på meir attraktive tenestetilbod og vekstkraft i næringslivet i regionale senter.

Med utgangspunkt i desse måla er følgjande hovudstrategiar utarbeidd:

1. Meir entreprenørskap og innovasjon
2. Fleire med meir relevant kompetanse
3. Ein velfungerande bergensregion og attraktive regionale senter

5.3 Utfordringar i Hordaland

Den utfordrande situasjonen i petroleumsnæringa har skapt trong for regional innsats for å redusere utfordringane knytt til arbeidsløyse og permisjonar. Frå april 2016 til april 2017 auka arbeidsløysa i Hordaland med to prosent. I same periode fall arbeidsløysa på landsbasis med fire prosent.

Fylkesrådmann vurderer at å styrke miljø som fremjar entreprenørskap og innovasjon og vekst i eksisterande verksemdar vil vere ein god måte å supplere det eksisterande omstillingsarbeidet i Hordaland på.

5.4 Fylkesrådmann si vurdering av mål opp mot ulike finansieringskjelder

Fylkeskommunen har fleire finansieringskjelder for å nå dei vedtekne måla. Det vil likevel vere ein styrke om budsjettposten «Næringsretta partnerskap» nyttast til det primære formålet.

Fylkesrådmann vurderer dette til å vere innan Regional planstrategi sin strategi om auka nyetableringar og framtidretta verdiskaping i næringslivet, og under måla i Regional næringsplan knytt til meir entreprenørskap og meir innovasjon.

For strategiane knytt til kompetanse både i Regional planstrategi og Regional næringsplan, vil ein kunne nytte av budsjettpost «HNN-statlege overføringar» for dei midlane som skal medverke til velfungerande næringsmiljø og tilgang til relevant kompetanse.

På same måte vil ein kunne nytte budsjettpost «HNN-statlege overføringar» og midlane øyremerka inkluderande og vekstkraftige lokalsamfunn i område med særskilte distriktsutfordringar, til utvikling av lokalsamfunn og regionale senter.

Fylkesrådmann rår til at budsjettpost «Næringsretta partnerskap» i hovudsak vert nytta til å fremje nyetableringar, innovasjon i eksisterande verksemdar og framtidsretta verdiskaping i næringslivet. Sterke klynger og næringsmiljø med stort regionalt nedslagsfelt, er gjerne etablert i Bergensregionen, og med dei gjevne føringane for «HNN-statlege overføringar» vil denne budsjettposten ha mindre handlingsrom til å styrke aktørane lokalisert her.

Aktuelle aktørar som er relevante for næringsretta partnerskapsmidlar, som er lokalisert utanfor Bergensregionen, vil det opnast for å støtte over budsjettpost «HNN statlege overføringar».

6. Retningsgjevande kriterier for næringsretta partnerskapsmidlar frå 2018.

Fylkesrådmannen ønskjer i si tilråding å ha ei stram prioritering for kva aktørar som skal verte løyvd støtte dei komande åra, og fremjar her forslag til reviderte kriterier som næringsretta aktørar må vurderast opp mot. Dei gjeldande kriteria i dag er framleis gode, men ikkje spissa nok til å kunne prioritere i høve tilgjengelege midlar.

Nokre av aktørane kan vere avhengig av fylkeskommunal støtte for å få tildelt midlar frå statleg hald, eller frå private finansiørar. Fylkesrådmannen vurderer det til at avhengigheita av fylkeskommunal støtte, enten for å utløyse annan kapital, eller for eksistensen til aktøren ikkje er eit gyldig argument for tildeling. Dette kan binde fylkeskommunen utnødvendig sterkt til aktørar med mindre relevans i høve dei vedtekne måla for regional næringsutvikling.

6.1 Framlegg til prioriteringskriterier for partnerskapsmidlar.

Fylkesrådmann vurderer det som mest hensiktsmessig å ha kriterier som byggjer opp om dei gjevne måla knytt til innovasjon, entreprenørskap og framtidsretta verdiskaping i Regional planstrategi og Regional næringsplan.

Hordaland har i dag fleire klynger, inkubatorar og grunderparkar, og er i ferd med å bygge opp fleire sterke miljø, som har merksemd på å få fram nye bedrifter, og for å sikre vekst og omstilling i eksisterande verksemdar. Store delar av desse miljøa er lokalisert i og rundt Bergen. Med føringane som er gjevne for budsjettpost «HNN statlege overføringar» er det utfordrande å nytte midlar av desse midlane for å styrke aktørane i Bergensregionen. «HNN statlege overføringar» vil først og fremst kunne nyttast til aktørar i andre delar av fylket.

For at fylkeskommunen skal kunne vere ein viktig pådrivar for næringsutvikling i heile fylket dei komande åra, vil fylkesrådmannen prioritere å stø opp om miljøa i Bergensregionen over budsjettposten «Næringsretta partnerskap».

Fylkesrådmann fremjar difor følgande forslag til prioriteringskriterier:

Næringsretta partnerskapsmidlar skal vurderast opp mot følgande:

- a) Aktøren arbeider med å fremje entreprenørskap og innovasjon, knytt til nye bedriftsetableringar og/eller vekst i eksisterande bedrifter.
- b) Aktøren samlar og styrkar innovasjons- og/eller entreprenørskapsarbeidet i ein større del av fylket/region. Aktøren famnar over minst to kommunar.
- c) Aktøren har innsatsen retta mot område/regionar med høy eller sterk vekst i arbeidsløysa.

I tillegg kan følgande punkt vere relevant å vurdere i særskilte tilfelle:

Aktører med lite anna offentlig støtte kan verte støtta i særskilte tilfelle, uavhengig av arbeidet med entreprenørskap og innovasjon

Aktører som vert finansiert saman med andre fylkeskommunar, må også vurderast opp mot dei andre fylkeskommunane sine prioriteringar.

Fylkesutvalet vedtar i budsjetthandsaminga 2018 kva aktører som skal få støtte i ein tre-års periode frå 2018 til og med 2020.